

Aningaasarsiaqartitaaneq pillugu inatsisip ilaasortaajunnaarnersiutisiaqartarnermut malittarisassartaasa allanngortinnissaannut siunnersuuteqaqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, taamaasilluni ilaasortaajunnaarnersiutisiaqarnerup nalaani akissarsiat tamarluinnaasa ilaasortaajunnaarnersiutisianit ilanngaatigineqarsinnaanngorlugit.

(Inatsisartuni ilaasortaq Niels Thomsen, Demokraatit)

Kingusinnerpaamik UKA 2019-mi aningaasarsiaqartitaanermut inatsisip allanngortinnissaanut siunnersuusioqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut, tassani aalajangersarneqassalluni, Inatsisartunut ilaasortat Folketingimi ilaasortaasut imaluunniit aamma kommunalbestyrelsimi ilaasortaasut aningaasarsiaat appartinneqartassasut tassani atorfirmik aappaani aningaasarsiaasa amerlaqataannik aamma taamannak ilanngaassisooqartassasoq borgmesteritut, borgmesterilluunniit tullersortaatus atorfik eqqarsaatigalugu. Inatsit atortussanngortinneqassaaq tulliani Inatsisartunut qinersisoqarneraniit.

(Inatsisartuni ilaasortaq, Tillie Martinussen, Suleqatigiissitsisut)

Akissuteqaat

(Naalakkersuisut Siulittaasuat)

Siullermeerneqarnera

Naalakkersuisut aallarniutigalugu Inatsisartuni ilaasortaq Niels Thomsen, Demokraatit, aamma Inatsisartuni ilaasortaq Tillie Martinussen, Suleqatigiissitsisut, aalajangiiffigisassatut siunnersuummik saqqummiinerannut qujaniarput.

Naalakkersuisut namminneerlutik Inatsisartunut Naalakkersuinullu ilaasortat aningaasarsiaqarnerat ilaasortaajunnaarnersiutisiaqarnerallu pillugit aningaasarsianut inatsimmi malittarisassanik allanngortitsinissanik pilersaaruteqaqqanngillat.

Aalajangiiffigisassatut siunnersuut Inatsisartuni akuersissutigineqassagalarpat Naalakkersuisut soorunami aningaasarsiat ilaasortaajunnaarnersiallu pillugit aningaasarsianut inatsimmi malittarisassat allanngortinnissaannut siunnersuummik suliaqarumarput.

Naalakkersuisut oqallinneq soqutigalugu malinnaaffigissavaat.